



Inatsisartunut ilaasortaq Erik Jensen
Siumut
Maani/

**Aalisariutit raajarniarnerlu pillugit malittarisassat pillugit § 37 naapertorlugu
apeqqutit nr. 033-2026**

03-03-2026
Suliap normua: 2026 - 3978
All. nr. 26251096

Postboks 269
3900 Nuuk
Oq. (+299) 34 50 00
Fax. (+299) 34 63 55
E-mail: apn@nanoq.gl
www.naalakkersuisut.gl

Inatsisartut suleriaasissaanni § 37 imm. 1 naapertorlugu Aalisarnermut inatsit taassumalu nalunaarutai pillugit apeqqutit nassiussivutit, pingaartumik aalisariutip angissusaa aamma raajarniarnermi malittarisassat pillugit apeqquteqarlutit. Apeqqutit suliaasaqarfisannit akineqartussanngorlugit innersuunneqarput.

**1. Aalisarnermut Inatsisip akuersissutigineqarnerata malitsigisaanik nalunaarutit
nutarterneqartuni kilisaatit basisliniep avataanut inissinneqartussat qassi
meter killigitinneqalerpa?**

1 pillugu) Aalisarnermi aalisariutip angissusaata malittarisassai Aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaat nr. 72 4. november 2025-meersumi aalajangersarneqarput. Nalunaarut taanna marloriarluni 2025-mi nutarterneqartarpoq. Aalisarnerup teknikikkut iluarsartuussivigineqarnera pillugu nalunaarutissatut siunnersuut nutaaq suliarineqarpoq, taannali sulit tusarniutigineqanngilaq.

Aalisarnerup teknikikkut iluarsartuussivigineqarnera pillugu nalunaarutip § 4-ani malittarisassat atuuttut naapertorlugit angallatit 24 meterit¹ imaluunniit 120 BT² sinnerlugit takinerusut aqutsiveqarfimmi tassani sinerissap tunngaviusumillu titarnerup 3 sømilit akornanni, aamma sinerissap qanittuanik taaneqartartumi, aalisaqqusaanngillat. Taamaattorli aalisarnerit arlallit immikkut malittarisassaqaqarput, matumani raajarniarneq aamma uiluinniarneq ilapput. Tunngaviusumik titarnerup 3 sømilit iluini aamma tunngaviusumik titarnerup 3 sømilit avataanni uiluinniarnermi angissutsit killeqartinneqanngillat.

Raajarniarnermi aalisariutit 40 meterinik takinerusut imaluunniit 1.000 tonsinik tamakkiisumik usitussusillit tunngaviusumik titarnerup 3 sømilit iluini raajarniaqqusaanngillat.

Angallatip aalisarnermi atortorisai tunngavigalugit angissutsit killilersorlugit aalajangersaasoqarneq ajorpoq.

¹ Angallatip takissusaa tamakkerlugu

² Tamakkiisumik usitussuseq

2. Kilisaatinik 40 meter sinnerlugu angissusillit sinerissap qanittuani aalisarsinnaanermut akuersissuteqartoqarpa aammalu taakkua sorliuppat?

2 pillugu) Aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaani § 5, imm. 3-ani atuarneqarsinnaavoq, aalisartoq nalunaarutip atuutilernissaata tungaanut tunngaviusumik titarnerup iluani sòmilit pingasut iluini angallammik 40 meterit takitigisumik imaluunniit 1.000 tonsinik tamakkiisumik usitussuseqarsinnaasumik aalisariummik aalisariuteqarluni raajarniarnissaminut akuersissutaatilik tunngaviusumik titarnerup iluani 3 sòmilit iluini sulii raajarniarsinnaatitaasoq.

Akuersissut taanna Kalaallit Nunaata Kitaani aalisariutinut tallimanut, ukununga tunniunneqarnikuvoq: *Polar Qaasiut* aamma *Polar Arfivik*, *Polar Seafood Greenland A/S*-mit pigineqartut; *Angunnguaq II* Angunnguaq A/S-imit pigineqartoq; *Tuullik* Tuullik A/S pigineqartoq aamma *Svend C*, *Sikuaq Trawl A/S*-imit pigineqartoq.

Taakkua saniatigut § 5 imm. 5-ip aalisariutit 40 meterinik takissusillit imaluunniit 1.000 tonsinik tamakkiisumik usitussuseqarsinnaasut Kalaallit Nunaata kitaata kujataani aamma avannarpassitsip 71°30'-p (Uummannaq) eqqaani tunngaviusumik titarnerup iluani raajarniarnissaminut akuersissummik tunineqarnikuupput. Taakkua saniatigut aalisariutit taakku kippasissuseq 54°20' tikillugu Sigguup Nuussuullu qeqertaata akornanni aqutsiveqarfittut taasap iluani tunngaviusumik titarnerup iluani aalisarnissaminut akuerineqarnikuupput.

Raajarniarnermi kilisaatit 13-it 40 meterit sinnerlugit takitigisut imaluunniit 1.000 tonsit sinnerlugit tamakkiisumik usitussuseqarsinnaasut pineqarput, malittarisassallu taakkununga atuupput.

3. Killeqarfiit eqqarsaatigalugit kilisaatit taakkua qanoq pilersaaruteqarfigineqarpat?

3 pillugu) Allanguutissatut massakkut pilersaaruteqartoqanngilaq.

4. Nalunaarutini 40 meter ataallugu angissusillit sinerissap qanittuani aalisartut aammalu pisassaattillit angallataat uutiterisunngortinneqassagaluarpas, basislinie 3 sòmil avataanut nuutsinneqassappat?

4 pillugu) Angallatit 40 meterit inorlugit takissusillit sinerissap qanittuani aalisartartut allatut nuutiterneqarnissaat pilersaaruteqarfigineqanngillat.

Tunngaviusumik titarneq Kalaallit Nunaanni imartap killeqarfianik titaanermi tunngaviuvoq, taamaattumillu nuunneqassanngilaq.

PNNP-imik aaqqiissut atorlugu aalisarnerit ad 1)-mi allaaserisat malillugit aalisariutit angissusaasa killeqartinneqarneri atuupput.

Raajarniarnissamut akuersissutit Kalaallit Nunaata kitaanut aamma Tunumut tamarmiusumut atorneqarsinnaasunngorlugit tunniunneqartarput. Aalisartoq ataaseq Kalaallit Nunaata kitaani sumiluunniit aalisarnissaminut akuersissutaateqarpoq. Aalisariutip angissusaata sumi aalisarsinnaanera killilersimaartarpaa. Aalisariutit 40

meterit inorlugit takissusillit imaluunniit 1.000 tonsinik usisinnaassusillit tunngaviusumik titarnerup 3 sɔmilil iluini avataaniluunniit kiffaanngissuseqarlutik aalisarsinnaapput.

5. Nalunaarutip taassumap nutarteqqinneqarnissaa Naalakkersuisut pilersaarutigivaat aammalu taamaassappat paragraf sorliit tamatumani eqqarsaatigineqarpat?

5 pillugu) Aalisarnerup teknikikkut iluarsartuussivigineqarnera pillugu Namminersorlutik Oqartussat nalunaarutaata nr. 72 4. november 2025-meersup nutarterneqarnissaa pilersaarutaavoq, tassani paragraffit arlallit nutarterneqassasut siunnersuutaapput. Nalunaarut sulit tusarniutigineqanngilaq.

6. 2026-imut rejertassiissutit suliffeqarfinnut qanoq aggulugaappat?

6 pillugu) Kalaallit Nunaata Kitaani raajarniarneq aamma Tunumi raajarniarneq marluullutik PNNP-imik aqqissuussap ataaniipput. Taamaalillutik 2026-mi pisassiissutit aalisartut pisassaasat malillugit agguanneqarnikuupput. Pisassiissutit takussutissartai aamma raajarniarnermi aalisartunut ataasiakkaanut akuersissutit KANUAPNA-p nittartagaani uvani takuneqarsinnaapput hjemmeside. Nunat marluk isumaqatigiissutaat naapertorlugit pisassiissutit agguataarneqarneri aamma takussutissami takuneqarsinnaapput.

7. Tunitsiviit Royal Greenland-ip ingerlatarivai aammalu Polar Seafood qassit ingerlatarivai?

7 pillugu) Royal Greenland A/S Kalaallit Nunaanni tunitsiviit 34-t ingerlatarivai. Taakku saniatigut tunitsiviit sisamat pigineqataaffigai. Polar Seafood Greenland A/S-ip ingerlatseqatigiiffiit tallimat pigineqataaffigai, taakku tunitsivinnik arfinilinnik ukunani Nuuk, Maniitsoq, Aasiaat, Oqaatsut, Uummannaq aamma Upernavik ingerlataqarput. Kalaallit Nunaanni tunitsiviit ammasut 56-iupput.

8. Tunitsiviillu sorliit tamatumani pineqarpat? Tunitsiviit Royal Greenlandimiit pigineqartuniit qassit imminut akilersinnaasumik ingerlappat? Qassillu imminut akilersinnaasumik ingerlanngillat? Tunitsiviillu sorliit tamatumani pineqarpat?

8 pillugu) Apeqqutinni tunitsiviit pineqarmata Royal Greenland A/S-imut tusarniaavunga. Ingerlatseqatigiiffik paasissutissiivoq Kalaallit Nunaanni tunisassiorfinnik tunitsivinnillu arlalinnik ingerlataqarlutik, taakkununga aamma nunaqarfinni tunisassiorfinnik tigooqqaavinnillu mikisunik inuussutissarsiornermi ingerlanneqartut ilaapput. Tunitsiviit aqqissuussaaneranni niuernerimi aamma Kalaallit Nunaanni suliffeqarfittut inuiaqatigiinni ingerlatsivittut inissisimanerminni mianerisassat ersersinneqarput.

Imminut akilersinnaaneq suliffeqarfissuarmi tamarmi ingerlaavartumik nalilersorneqartarpoq aningaasaqarnermillu tamarmiusumik aqutsinermut ilaalluni. Kisianni tunitsiviit ataasiakkaat pillugit paasissutissat niuernerimi mianernartuummata, tassunga ilanngullugit sorliit sinneqartooruteqarluni amigartooruteqarluniluunniit ingerlanneqarnerisut immikkuualuttunngorlugit tamanut saqqummiunneqarsinnaanngillat.

Peqatigitillugu erseqqissassallugu pingaartuuvoq, tunitsiviit tamarmiunngitsut taamaallaat killilerujussuarmik piffissamullu sivikitsumut imminut akilersinnaassutsimut tunngavik aallaavigalugu nalilersorneqartartut. Tunitsiviit pingaartumik najugaqarfinni inukitsuni suliffeqarnermut, attavilersuutitut inuussutissarsiummilu tunngaviup attatiinnarnissaanut pingaaruteqarsinnaapput. Pissutsit tamakku ingerlatsinermik ataatsimut nalilersuinermi ilanngunneqartarput.

Royal Greenland A/S-ip tunisassiorfimminik tunitsivimminillu tamanik imminut nappassinnaasumik akisussaassuseqartumillu ingerlatsinissaq ataatsimut isigalugu ingerlaavartumik qulakkeerniartarpaa.

9. Naalakkersuisut allanik paasissutissaasinnaasunik peqarpat?

9 pillugu) Naagga.

Inussiarnersumik inuulluaqqusillunga



Peter Borg

Aalisarnermut, Piniarnermut, Nunalerinermut, Imminut Pilersornermut Avatangiisinullu
Naalakkersuisoq